



Тәуелсіздікті бірінші орынға қояйық!

Шыдамадым қапасқа,
Кеңшілікке қаштым.
Көндікпедім матауға,
Асау атша бастым.
Уһ, шырқап, зымырап,
Сұңқардай зулап ұшайын!

Ұшайын! – деп, дүние құндылығы бостандықта екенін Сәкен Сейфуллин атамыз да жырлап өтті. Расымен-ақ, тәуелсіздік бізге оңайшылықпен жеткен жоқ. 1986 жылы болған қанды оқиғаны ғана тәуелсіздіктің бастауы деп кесіп айта алмаймыз. Себебі, бұл жылдарға дейін де ел басында болған Жоңғар жапқыншылығы, Ұлы Отан соғысы, қазақ жеріндегі ұлт-азаттық көтерілістер, мұның барлығы бостандыққа ұмтылудан, тәуелсіздікті сақтауға деген күрестер болатын. Ғасырлар бойы отаршылықпен күрескен қазақ халқы қажырлы қайсарлығының нәтижесінде, «Желтоқсан оқиғасының» ықпалымен тәуелсіздік таңын атырды. Алайда, осы тәуелсіз шағымызды әр жыл сайын 16-желтоқсанда еске алып, тойлап жатқан кезде көпшілік халық бостандық мерекесін емес, «Жаңа жылды» асыға күтеді. Жақында кішкентай бауырларымнан: “жақында қандай мейрам келе жатыр?” дегенімде, олар: «Жаңа жыл», – деп ерекше қуанышпен айтты. Әрине, жаңа жылда сыйлық алып, көңіл көтеру сәбилер үшін қызық. Дегенмен де, өз кезінде М.Әуезовтің: «Ел болам десең, бесігіңді түзе» деген тағылымды сөзі бар. Біздің болашағымыз – бүгінгі жас балалар болса, олар да «Жаңа жылды» ерекше күтіп, егемендік мерекесін кейінге қалдырып отыр. Біз қазір жас ұрпаққа тәуелсіздіктің жаңа жылдан маңыздылығын ұғындырып, бірінші осы патриоттық мерекемізді қарсы алатынымыз жөнінде айтып отыруымыз қажет. Өзгеге үйрету үшін өзімізді оларға үлгі болатындай тәрбиелеуіміз қажет. Алайда, көпшілік қауым қарашаның соңынан бастап-ақ шыршаларды безендіріп, әртүрлі құттықтау плакаттарын мекеме қабырғаларына, көшелерге іліп қояды. Осы көріністерді көргенде, қанмен келген «тәуелсіздіктен» өзге ұлттың «Жаңа жылы» соншалық артық болып кетті ме деп қынжыласың. Тіпті теледидардың өзінде «Жаңа жылға» арналған жарнамалар, халықтың назарын бұрып жатады. Мұндай жарнамалардың санын азайтып, «Тәуелсіздік күніне» арнап қысқа роликтерді көрсетсек, көшелерге Қ.Рысқұлбеков, Л.Асанова, С.Мұхамеджанова сынды ұлт жана-шырларының суреттерін іліп, олардың қанатты сөздерін іліп қойсақ нұр үстіне нұр болар еді. Айналамызда «Тәуелсіздік мерекесінің» иісі шығып тұрса «Жаңа жылдың» лебі қатты келмес те еді. Көптеген елдер автономия ретінде ғана өмір сүріп, тәуелсіздікке әлі қол жеткізбегенде, біз әлдеқашан сол бостандық құсын қолымызға қондырған болатынбыз. «Алтынның қолда барда қадірі жоқ» деген қазағымда даналы сөз бар. Сондықтан да алтыннан да құнды егемендік күнін басқа мерекенің көлеңкесінде қалдырып қою бізге ұят дүние.

**Балжан АБЫЛҒАЗЫЕВА,
Ш.Смаханұлы атындағы
№62 гимназияның
11 «Ә» сынып оқушысы.
Алматы қаласы.**